

# **Kiristoos Yisa Tarjamonnante Kinin Yittsaa Bhawloos**

## **Pilbhisooos Eenana**

### **Kinin Thaapoono Warqanno**

#### **Ardinta**

Pilbhisooos katamano Moqodoonia peente ko dahade. Kedi Roome eedi yinin dohonna, “Roome peen yiggino woam toolasane” hamayse keda odime. Pee waana waanara nivayna nagganna kataman ogoka keda sage.

Bhawloos Thirovaddar dahayse Barjokala shedintoka Moqodoonia eedi kalaa “Wokal nivayse woam kelshaai!” hamayse kinin giyena haapayse, ogona “Barjo ogodar wonin yivoadettsi eelidine” hamayse Pilbhisooos katamandar ki yivade (Yi Waa 16:9-10). Sillaasbee, Thimaatoosbee, Luqaasbesana Pilbhisooos yeskayse ukunsen rooroaka Ayiwd eena miskana bayn gasante kenin buken raqinte waani waani maanana Barjosa dhacchintan upsinam ke tarjade.

Liidiabee kosa oonin eenabe Barjodar woylamin ke qajade. Pilbhisooos misken ooninsa woysadhidino kennon goynkane (Yi Waa 16:13-15). Budobar Bhawloos beeronam waadima eedi kallorra kinin bulenka, kosa imbana Bhawloosbee Sillaasbeam yedayse kataman wottsaynasa birante bersayse dhaxin ooninte ke dhaskade (Yi Waa 16:19-24). Barjo peenin zigimoadettsi kinin haysonna, dhaxin ooninam toolea ea Barjosa kantanam haapayse kidar woylamin ki qajade (Yi Waa 16:25-34). Ogoraar Bhawloosbe dhaxira ke buldhade.

Thoothi levesa budonte Bhawloos Roome katamante dhaxadhayse kaa warqataam 52-54 levensa iinte ki thaapade. Ogotear buuda beerimeka ki dhaxadhaakaar, gebhi wozaka Pilbhisooisir dahaana Barjodar woylamin qajaanana Barjosa dhacchintan upsinam thoothi guyada kena ki thaapade.

Kaa mathaapaam raq saldar kashana dandima ko dandime:

1. Nagaymakkono (1:1-2)
2. Barjodar woylamin qajaanasa Bhawloosin thettsoono gobshinbee miskenbe (1:3-11)
3. Bhawloosbee kisa dayntanbesa (1:12-26)

4. Barjodar woylamin qajaana hamin daa keam zaskayno (1:27-30)
  5. Kiristoossa bhochinbee kamsinbe (2:1-18)
  6. Thimaatoosbee Ebhapirooditosbe Barjodar woylamin qajaanana kenin qaaboono (2:19-30)
  7. Bhawloosbee kisa kamsinbe (3:1-21)
  8. Bhawloossa gobshinbee kiilimenbe (4:1-20)
  9. Macchin nagaymakkono (4:21-23)
- 

**1** <sup>1</sup>Yesus Kiristoossa waadima eedi maataana i Bhawloosbee Thimaatoosbekalanka Pilbhisos katamante dahayna Yesus Kiristooska gaza maataana wulna, pir misken ooninsa donzanabee waani waadiman eenabena nittsadhoono warqannone. <sup>2</sup>Wosa Imbaa Barjobee Imbaa wontea Yesus Kiristoosbesa sunin imintonbee payyamonbe yena ko dee.

### Bhawloos Barjoam Kinin Gobshoono

<sup>3</sup>Yeam inin bhocchen wodan wulka isa Barjoam ida gobshe. <sup>4</sup>Ye wulna Barjoam inin misken wodan wulka, rooro wul wozaka ida miske. <sup>5</sup>Biraa rooroara yedayse kinaka yekka Barjosa dhacchintan upsinam inin giyenka imbesana waadadhaana yenin maatonna Barjoam ida gobshe. <sup>6</sup>Yesus Kiristoosin nivea rooroaka yekka payyan waadimanam yesa iiinte yedaa Barjoyn yeskisenam gon inta dhesidine. <sup>7</sup>Ye wulna ogodettsi qaaba iam koda zaske. Ogonoar isa dhaxinka ko hanna, Barjosa dhacchintan upsinam gon konin dohonam keedhadhenbee ogoamaar wocchinsadhenbeka ko hanna, Barjosa sunin imintonka yedi wulatte kashimayna yenin dohonna, yedi rooro wul isa woylaminte ye dahade. <sup>8</sup>Yesus Kiristoossa nashimmakkonka yedi wul hamaddha ikal yenin bhoqensa Barjo isa tarjane.

<sup>9</sup>Yesa nashimmakkono dhesintobee bhocchibeka thoothoono maatayse gebhaate konin yivoadettsi yena Barjoam ida miske. <sup>10</sup>Ogonoar kattsi payya maaten yerinam marmarayse yenin dhesoadettsibee Kiristoos maataate kinin nivea rooroaka gazanabee siyamo yindar qolminabe maatayse yenin haapadhoodettsine. <sup>11</sup>Ogodettsin dayntan yennonka Yesus Kiristooskala haapadhen tipa waadimaka thoothaana maatayse Barjona gobshi hapsayna yeda maate.

### Bhawloossa Dhaxino Barjosa Waadimanam Konin Workisoono

<sup>12</sup>Imbanaanato, ogono idar yeskoono yerro Barjosa dhacchintan upsino kattsi konin workoadettsi konin hayenam yenin dhesoadettsi ida nashe. <sup>13</sup>Inin dhaxadhoono Kiristoos goynka konin dohonam hayonasa oonin toolaynabee waani een wulbe dhesidine. <sup>14</sup>Inin dhaxadhon goynka Barjodar woylamin qajayna thoothina Barjosa upsinam kurtumbhima giyana Imba wontea Yesuska kedi sagi kanta haapidine.

<sup>15</sup> Waani waani Kiristoossa tarjen upsinamkenin giyayno woogintabee palimebekane; waani pir payyamon qaabenka keda giye. <sup>16</sup> Igina Barjosa dhacchintan upsinna inin palimoadettsi inin kambhonam yinin dhesenna, nashimmakkoka ogoam keda haye. <sup>17</sup> Igina waani Yesus Kiristoossa tarjayna lemmakkoka dayma, meten yinnonam gettsota isa dhaxindar gaale ab idar bovota qaabaysene.

<sup>18</sup> Ogona dhari maataamaka ko dhaaakaar, gonka ko dhaaakaar, goyti wulka, Kiristoossa tarja ko tarjadhe. Ogokaar wozadhayda wozadhe; os birantear wozadhayda wozadhe. <sup>19</sup> Ogonoar yesa miskenbee Yesus Kiristoossa Manpasin kelshonbeka ko gaalera inin dhaqenam inin dhesennane. <sup>20</sup> Roro wul inin hayendettsi kinaar sadaka i dhaaakaar way i diyaakaar, Kiristoos i kaa waan qaadhaaka gobshadhasane hamaye kurtumbhima may ida giye. Pir yer hamin dahaa goytika ooshimbhayse inin haapadhoamadettsi gebhi anngarmaka qaabe hayte i dahade. <sup>21</sup> Harrna hambidianna, ina sadaka daa haminta Kiristooska daynta hamintane; diynta haminta yer payya haapintane. <sup>22</sup> Ko dhaaakaar ko waanka dehea i hanna, aapi imea waadima ida waadadhe. Dahayse dayntabee dembibesa hamaam kama iam konin zaskenam dhesattine. <sup>23</sup> Igina lamaana qaabonaka inta gaalidine. Kiristoosbesana dayntano yer wuldara konin sagenna, diyayse kimbesana kinka daana ida anngardhe. <sup>24</sup> Ko dhaaannaar sadaka isa daano yena kattsi zaskaynone. <sup>25</sup> Ogoam inin dhesonna dembhira dhaqayse yesa Barjodar woylamin qajidino konin gebhoadettsibee woza yenin haapoadettsibe ye wulbesana inin kappenan dhesayda dhese. <sup>26</sup> Inta pir yekal maataate inin nivenka, inka yesa dohoono pormakkono Yesus Kiristooska koda thoothothe.

<sup>27</sup> Keeda yer wuldara sagi maatayno dayntano yesa Kiristoossa dhacchintan upsinam gobshayno ko dee. Ogonoar inta nivayse yeam inin shedenka, way yekalanka i pegadhaakaar bhocchi kalaaka wocchimbhayse yenin woyenbee kinka Barjosa dhacchintan upsinam yeskisana yenin mashimenbeam ida qanse. <sup>28</sup> Yembesana palimaynaam hamin hambhaakaar kurtumbheebhode; ogono yesa wocchimbheno kena kayesa milkit konin maatenka, yena dhaqintasa milkitne; yenin dhaqaynoar Barjosa kantankane. <sup>29</sup> Kiristoosna waadadhana baali yena imbhoono kidar woylamin ye qaje bish dayma, tapir kinnon goynka gaale ye tiyene. <sup>30</sup> Ogono gaalen mashimeno ena birayse idar ko yeskaysaka yedi haapidine; taar yeskaate konin dohonam yedi qansaate ye dahade. Ogonante taaki imbesana gaalite mashimayna ye maatade.

### Kiristoossa Payyan Qaabonsa Kamsino

**2** <sup>1</sup>Kiristooska yesa wocchimbhe daa ko hanna, kisa nashimmakkonkaar wocchimbhaana ye hanna, Manpas Gazankaar kinka kalaa maataana ye hanna, kinka kinka kinaar burqadhyaynabee

payya yer hayaynabe ye hanna,<sup>2</sup> nashimmakko kalaabee, woylem kalaabee, qaabo kalaabeka maatayse kinka kinka agintaka, isa wozanam thoosee.<sup>3</sup> Metenam toskayse waani eenaam yedara kattsi sagi kenin dohonam bhocchee; meten yennonam getsayse way “Idara sagea hayne?” hamayse pormakkoka yer kala hattear hayeebhode.<sup>4</sup> Yin yedi kalaa kalaana yena agen bish dayma, eedi abnaar agenam bhocchee.

<sup>5</sup> Yesus Kiristoosdar dohoono qaabono yedarar ko dee.

<sup>6</sup> Kidi Barjo dantanka dahayse

Barjobesana kiaddha maasenam yina yedana bhocchadehe.

<sup>7</sup> Ogona yisa dohon gobshinam garayse

eedina waadima eedi dantanam tiyayse ki haapadhade;  
peen kodar eedidettsi maatayse ki dahade.

<sup>8</sup> Meten yinnamon toskayse

dembhi ko hannaar, diyota Barjona ee hamaa ki maatade;  
ogonoar masqalindar konngadhayse ziitadhidinkane.

<sup>9</sup> Ogonante Barjo kiam kattsi dheg ki hayade;

naabe wulsa bhaabar hama naabe kina ki imade.

<sup>10</sup> Ogona Yesussa naabenam gobshintaka

cecinbee, peenbee, peensa choobarbe dahaana wul  
buqon yinnamon kaenin kumpurdhoodettsine;

<sup>11</sup> yisa aponkaar

“Yesus Kiristoos Imbane” hamayse kenin tarjoadettsine.

Yin hayntaka Barjo Imbaam keda gobshe.

### Peendar Dohon Eenna Shaaka Maatinta

<sup>12</sup> Ogonante isa nashonato, inta yembesana inin dohon wodan wulka ina ee hamayna yenin dohondettsi, ta yekala pegadhayse inin dohon wodanka sagi ee hamayna yenin doadettsi ida bhocchise. Ogodettsi yedi kalaa kalaana yenin dhaqonam may hayana kurtumbhebee gibazabeka wocchimbhayse waadadhee.<sup>13</sup> Harrna hambidianna, Barjo yisa payyan bhocchinam yenin zagoabee hayoabedettsi yesa iinte hayea Barjone.

<sup>14</sup> Waadima hamaamaar yenin waadadhenka gundumimabee palimimabe waadadhee.<sup>15</sup> Yin hayayna ye hanna, ko wodan een wobonbee siyonbesa shaarinte wuupobee siyamobeysa qolmina Barjosa gazana naana maatintaka, peen kodar wancodettsi shaakayna maatayse yeda haapadhe.<sup>16</sup> Ogoro yin konin maatayno, sadan imen upsinam kena garma yenin giyenkane. Ogodettsi isa gobenbee isa waadimanbe sun pootima maatayse konin shidhiminna, Kiristoos nivea rooroaka kanka inin erimea isa yer daane hamintane.

<sup>17</sup> Yesa Barjodar woylamin qajidinbee waadimanbe Barjona marsha machadheadettsine; pir i deesadhdianiisa zombhino marshandar laldhea wucimadettsi konin maatenna, ida wozadhe; isa wozanamaar

yembesana ida kashime. <sup>18</sup>Ogodettsi yedi wozadhee; yesa wozanamaar imbesana kashimee.

### Thimaatoosbee Ebhapirooditosbesa Waadimano

<sup>19</sup>Intaar yennon goynsa qansayse inin wocchimbhoadettsi, Imbaa wontea Yesussa bhocchi maatidi ko hanna, Thimaatoosam saana yedar yittsana qaabe ida haye. <sup>20</sup>Yesa dayntan goynsa idettsi woylam wulka bhocchea eedi ab qolehe. <sup>21</sup>Waani eena wul yina maaten yerinam keda zage; Yesus Kiristoosna maaten waadimanam qaabehe. <sup>22</sup>Thimaatoos taysate shedadhenkaa gon hama eedi kinin dohon, pir naasibee imbabe kinka kenin waadadhendettsi, kidi imbesana kinka Barjosa dhacchintan upsinam giyaate kinin waadadhonam yedi dheseeda dhese. <sup>23</sup>Ta keeda inno yerro hardar konin yeskonam inin qansonsa budonte Thimaatoosam saana yedar yittsana bhocchi ida haye. <sup>24</sup>Taar inta imal yekal saana inin nivoadettsi Imbaa wontea Yesus haya ki haye ida hame.

<sup>25</sup>Ko dahaannaar iam kinin kelshoadettsi yenin yittsaa Ebhapirooditos, isa imbanaas maataabee imbesana kinka Kiristoosna banqin kanseabeam yekal maasate yittsa ko iam zaske hamayse inta bhocchidine. <sup>26</sup>Yedar kiam yittsana inin zagoono yeam shedana kinin anngardhonnabee yedi pir kisa hajadhidinam yenin qanson goynka kidi kattsi kinin qaabonnabene. <sup>27</sup>Kidi gon hajadhayse diyana yeskidine. Ko dahaannaar Barjo kina burqadhayse kiam ki pacchade; kibisheana dayma, pir ogo galshen qaabondar qaabe ab idar yeskoamadettsi ki hayade. <sup>28</sup>Ogonante kiam pir yenin shedenka yenin wozadhoodettsibee isa qaabon tokoadettsibe yedar kiam yittsana kattsi i zagade. <sup>29</sup>Keeda gebhi wozadhaate Imbaa wontea Yesus goynna hamayse kiam tiyee; kidettsi dahaana eenaamaar gobshee. <sup>30</sup>Harrna hambhidianna, yedi ikal nivayse iam kelshana yenin damaamonam kidi waadadhota sadan yinnonam anngardhima Kiristoossa waadimanna hamayse dembhina ki yeskisade.

### Gonin Hammo Tipamono

**3** <sup>1</sup>Macchindar, imbanaanato, Imbaa wontea Yesuska wozadhee. Kosa birayse yena inin thaaponam tapir yena thaapania iam tottsehe; pir yeam dhaddhiserra toolana damasane. <sup>2</sup>Qaskidettsi maataana, siyon hayayna, zaskaama goytika eensa bishinam taxayna eenakalanka mete yesaam gishee. <sup>3</sup>Wodi Barjosa Manpasinka goodimayna, wosa waandar keedhimayse dayma, Yesus Kiristooska erimayna wonin dohonna, gonin hamon qaamanam taxadhaana wodine. <sup>4</sup>Intaar waandar inin keedhimayno yer isa daane; waani eneo waan yinnondar konin keedhimea yer kona maataakaar inta kodara sagayda sage. <sup>5</sup>I adhadhaysaka lankaysoa rooroaka isa qaamanam ko taxadhade; inta Biiniam muldhara dahaa Israveel eedine; pir gon hama Ibra eedine.<sup>a</sup> Muse yigginam toldhen goyn ko hannaar, inta Parisa eedine. <sup>6</sup>Barjo goynka

<sup>a</sup> 3:5: “Gon hama Ibra ea” haminta Israveel eensa gilon wulam tooleane hamintane.

woogimbhea i hanna, Yesusdar woylamin qajaynaam ida oyte; Muse yigginam toolintaka haapadhayno tipamon goynka ko daana, inta siyamoysa qolma eedine.

<sup>7</sup>Ko dahaannaar kosa birayse ina pootayna yerra wulam Kiristoosna hamayse pootimadettsi hayayse i paydade. <sup>8</sup>Ogora sagi isa Imbaa Yesus Kiristoosam dhesintano yer wuldara kattsi konin sagenna, waani yerin wulam pootima yerdettsi koam ida payde. Kina hamayse yer wulam i kaysade; Kiristoosam haapanaa yer wulam hargedettsi ida payde. <sup>9</sup>Ogoam inin hayaynoar Muse yigginam toolintaka inin haapen tipamonam dayma, Kiristoosdar woylamin qajintaka haapadhen tipamonam haapayse Kiristoosbesana kalaa maatanane. Tipamon ogoam Barjo kidar woylamin qajayna eenana kida ime. <sup>10</sup>Kiristoosbee kisa dembhira dhaabhidinsa kantanbeam dhesana, kisa gaalenkaar kimbesana kinka kashimanabee kisa dembhinkaar kidettsi maatanabe ida zage. <sup>11</sup>Ogona inta diyaanayn dembhira dhaabhendar inin yeskoadettsine.

### Macchindar Yeskana Gobinta

<sup>12</sup>“Ko wulam inta haapidine” way “Ogo wulka gonin ea i maatade” hamattine. Ko dahaannaar Yesus Kiristoos iam yinti eedi hayayse kinin bhocchonam yedana os birandar ida gobe. <sup>13-14</sup>Imbanaanato, inta akar ogodar yeskidine hamayse paydattine. Ko dahaannaar yer kalaa ida haye: Isa budonte dohonam walaate, isa birante dohon bazanam tiyana wocchimbhayse ida gobe. Ogono inin tiyayno bazano Barjo Yesus Kiristooska tura cecindar eelaye ina kinin imayno gonin hamon sadanone.

<sup>15</sup>Keeda Kiristooska gebhaana wodi wul koam wo bhocche. Yer ab bhocchayna ye hanna, Barjo ogoamaar yena may hayasane. <sup>16</sup>Yin ko dahaakaar ta wonin yeskon dayntanka kiaddha maatoono wosa dayntano ko dee.

<sup>17</sup>Imbanaanato, inin hayendettsi hayayna eena maatee; wosa kamsinka yivayna wulam payya hayayse shedee. <sup>18</sup>Harrna hambidianna, kosa birayse thoothi woda yena inin giyaadettsibee ta ermitka eepite yena inin giyendettsibe, thoothino eeno yisa yivintanka Kiristoos masqalinsa banqi eed ko maatade. <sup>19</sup>Kesa macchino kayene; kesa barjoa iine; kesa gobshino ooshimbhekane; kesa qaabono peen yerindarne. <sup>20</sup>Wonno peeno ko hanna cecintene. Ogora nivea woam Dhacchea Imbaa wontea Yesus Kiristoosam anngarmaka woda toole. <sup>21</sup>Kidi yer wulam yisa hayamon demente hayana damisen kantaka ooshimbhe yindar dohon wosa bishinam ookayse, yisa gobshinsa bishi konin maatoadettsi kida haye.

### Macchino Kiilimeno

**4** <sup>1</sup>Keeda inin nashaynabee kattsi inin bhocchaynabe imbanaanato, pir ininka wozadhaynabee isa waadimansa aapi maataanabe, yedi Imbaa wontea Yesuska wocchimbhayse woyee.

<sup>2</sup>Ewodiabee Sinthikibe kinka kinka Imbaa wontea Yesuska agayse kenin doadettsi keam ida miske. <sup>3</sup>Yaar gonin ea, imbesana kinka waadadhea imbanaasa, igma maanaam hanin kelshoadettsi ida miske. Kedi imbesana waadadhaana Qeleminthoosbee waani eenabesana kinka maatayse Barjosa dhacchintan upsinam eenna yeskisana kedi mashimidine. Ke wulsa naabenaam dayntan mathaapinte thaapadhidine.

<sup>4</sup>Roro wul Imbaa wontea Yesuska wozadhee. Pir yena ida giye: Wozadhee! <sup>5</sup>Yesa lemmakkonam rooro wul eedi wulna dhehee. Imbaa wontea Yesussa maataate nivano saanidine. <sup>6</sup>Yer wulka Barjoam gobshika miskaate yesa oysimenam kina dhettsisee. Yer kalaaka hattear qaabite gaaleebhode. <sup>7</sup>Eedisa bhocchi wulra sagi maatoono Barjosa payyamono yesa woylaminbee yesa qaabonbeam Yesus Kiristooska koda toole.

<sup>8</sup>Macchinte, imbanaanato, gonbee, gobshibee, tipabee, gazabee, nashadheabee, shawkadheabeam bhocchee; kattsi payya way gobshadhayno ko hanna, igma wulam maasite maasite bhocchee. <sup>9</sup>Ikala yenin timmironbee yenin tiyonbe, ogonoar inin giyenka yenin qansonbee inin hayenka yenin haaponbeam hayee. Payyamon Barjoa yembesana kida dee.

#### Bhawloos Kina Nittsadhon Imintonna Kinin Gobshoono

<sup>10</sup>Thoothi wodansa budonte tapir isa gaalen goynka yenin bhocchonna, Imbaa wontea Yesuska kattsi ida wozadhe. Ta koka yekka yenin qaabonam waadimaka dhaana goyi payya haapeetene; isa gaalenna qaabite ye dahade. <sup>11</sup>Pir ogoam inin giyayno isa dayntanna zaskayno qolmakatehe. Harrna hambhidianna, “Isa dayntano ina yeeda ko yeeke” hambhenam inta timmiridine. <sup>12</sup>Bashadhintanam ko dahaannaar, thoothika haapintanam ko dahaannaar, dhesayda dhese. Raq hamote ko hannaar, hamaa wodakaar mishintabee, daaqardhintabee, haapintabee, kaysintabeam inta dhesidine. <sup>13</sup>Kantanam ina imea Kiristooska yer wulam damayda dame.

<sup>14</sup>Ko dahaannaar isa gaalenam imbesana kinka kashimayna yenin maatonna, payya ye hayade. <sup>15</sup>Ogonoar Barjosa dhacchintan upsinam yesa shaarinte giyan inin yedenka, Moqodoonia peera inin uten wodanka, ye Pilbhisos gidir dahaana eena yesa misken oonira ab ina koymon imintakabee tiyntakabe iam kelshaa misken ooni qolmonam yedi dheseeda dhese. <sup>16</sup>Teselonqe katamante inin dohonka, ina zaskenam lamaa goyt yedi nittsidine. <sup>17</sup>Yesa imintonam anngardhayse dayma, yesa imintonsa aapino kalon yena konin thoothoadettsi anngardhayse ida giye. <sup>18</sup>Iam zaskenbee iam zaskenbesa bhaabar hamon ina yenin yittson imintonam Ebhapirooditoskalanka inta tiydine. Ogono imintono Barjoyn tiyayse kanka wozadhen payya gaamen shittonka thoothon marshandettsine. <sup>19</sup>Isa Barjoa yisa gobshinka dohon thoothin

wodimmakkorra Yesus Kiristooska yena zasken wulam kida ime.<sup>20</sup> Wosa Imbaa Barjona rooro wul lay gobshi kina ko dee; amiin.

### **Macchin Nagaymakkono**

<sup>21</sup> Yesus Kiristooska dahaana gazana eenä wulna “Nagaya” hamee. Imbesana kinka dahaana imbanaana yena “Nagaya” keda hame.

<sup>22</sup> Gazana eenä wulbee kattsika Roome peen bitaasa waadiman eenabe yena “Nagaya” keda hame.

<sup>23</sup> Imbaa wontea Yesus Kiristoossa sunin imintono yembesana ko dee.